



UNIVERSITÄTS-
BIBLIOTHEK
PADERBORN

Universitätsbibliothek Paderborn

**R. P. Ioannis Evsebii Nierembergii Vita Divina, Sev Via
Regia Ad Perfectionem**

Nieremberg, Juan Eusebio

Monasterii Westphaliae, 1642

Capvt XXX. De Dei-formitate & Vita Divina, quam Animæ aliquæ sanctæ
participant.

[urn:nbn:de:hbz:466:1-46790](https://nbn-resolving.org/urn:nbn:de:hbz:466:1-46790)

CAPVT XXX.

De DEI-formitate & Vitâ Divinâ,
quam Anima aliqua Sancta partici-
pant.

EX uni-formitate ista, & cum divina vo-
luntate summâ, quam dixi, consensio-
ne DEI-formitas nascitur Vitâque Divina.
Sacrosancta namque & adoranda Majestas
illa, quæ cælum terrâque implet, iis qui
puritatem hanc perfectionemque consecu-
ti sunt, nomen suum communicare digna-
ta est, apud Davidem dicendo: *Ego dixi, Dii
estis, & filii Excelsi omnes*^a. cui consonans in
Evangelio suo Magister noster IESVS, ad Pa-
trem conversus, *Rogo, ait, ut omnes unum sint,
sicut tu Pater in me, & ego in te, ut et ipsi in nobis
unum sint*^b. Arcto adeò nexu cupiebat nos
bonus IESVS cum DEO colligari & uniri,
ut unum potiùs videremur quàm uniti. Ad
honorem istum amplissimum ascendit ani-
ma, quando propriam voluntatem jam fre-
git, penitusque conculcavit & contrivit, at-
que

^a Ps. 81, v. 6. ^b Ioan. 17, v. 21.

que illam in rebus omnibus, quantum huius vitæ status admittit, ad divinam conformavit: quando deinde eadem voluntate suâ annihilatâ, & in profundissimam nihili sui abyssum altissimè demersâ, supra se-ipsam se attollit, modòque admirabili in DEVM Dominum nostrum quodammodo transmutata, res omnes vult, non tamquam si ipsa eas vellet, sed DEVS in ipsâ; talem se exhibendo, atquè si voluntate creatâ exuta, solam haberet voluntatem divinam, quâ animata viveret operareturque omnia; & quasi non unionem dumtaxat cum illâ obtineret, sed unitatem, habendo voluntatem aliquam, similiter ac si (ut sic loqui liceat) non haberet. nam quas res vult, eas nō vult, ut volunt homines, verùm perinde ac si solus in ipsâ eas vellet DEVS; cui voluntatem olim suam libertatēque omnem, in reliquam vitam, sponte suâ, omni ex parte consecravit, seque in mancipium perpetuum tradidit, multò magis, quàm S. Paulinus, cum liber esset, lubens volens hominī barbaro captivum se dedidit. c. denique

Qs haud

c S. Greg. Dialog. lib. 3, cap. 10.

haud aliter, quàm si omni omnino voluntate destituta esset.

Admiranda isthac transformatio tum peragitur, quando anima res ad DEVM ejusque honorem & gloriam pertinentes ita intuetur, ac si ipse DEVS essent, easdem non tamquam res alterius, sed uti sibi maximè proprias considerando: contrà verò res suas aspiciendo, non ut alienas modò, sed quasi ad neminem in toto mundo pertinerent. ita ut quidquid ad ipsam quoquo modo spectare potest, uti ipsius honor, commoditas, corporalis spiritualisque oblectatio, non magis revera quærat, quàm si nata nunquam, aut ad nihilum redacta fuisset; ad solum semper DEVM attendendo, ipsius amore tota occupata, jam nunc faciendo, quod per omnem æternitatem, in Angelorum Beatorumque Cælitum, quorum hoc erit studium unicum, societate est continuatura. Adjuvet nos, per obedientissimi Filii sui Sanguinem clementissimus DEVS, ut illum in modum faciamus, divinamque voluntatem compleamus in terrâ, sicut in cælo impletur. Amen.